

pour nos affaires vous cognoistrés quel hōme c'est, ce qu'il peut, & l'esperance que nous auons de faire choses grandes, si des c'este Année vous nous voulez ayder & ioindre vos pieuses volonteés avec les nostre vous vous adresserez à Monsieur Hoüel lequel ledict Sr. Guera vous fera voir, nous restons trois Religieux Prestres à la nouvelle France, avec le F. Oblat que vous auez veu resolu de ne iamais abandonner ledict Pays, ains d'y faire ce que nous pourons pour le seruice de Dieu, du Roy, & du biē Public, ce qui nous releue le cœur est le bon commencement que nous voyons & l'aparence belle de faire de grands fruiets, si le tout ne reüssit pour n'estre secondéz nous ne laisserons pas d'auoir gloire deuant Dieu, & deuant les hommes, ie souhante avec passio que vous soyez le premier participant de ce bien. Notez s'il vous plait Monsieur qu'il y à treize ans que l'habitatio subsiste sans que iamais aucuns Estrangers & moins encore les Sauvages qui nous desirent, & nous reçoient à bras ouuerts ayent rien attenté a'encontre, en laquelle habitatio nous auons semblablemēt vne maison & Chapelle ou nos Peres ont fait depuis six ans & font tous les iours le seruice Diuin pour la consolatio des François qui sont en icelle, j'espere des lettres de vous l'année prochaine, qui m'apprenderot vostre derniere resolutio, ce pendant nous vivrons en esperance, que Dieu fera reüssir par vostre moyē c'est Auguste de sein & offrons à sa divine misericorde iournellemēt nos prieres pour tous ceux qui y contribuerot & particulieremēt pour vous à qui ie suis & seray toute ma vie,

MONSIEUR,

*Tres-humble & deuot Seruiteur en Jesus
Denys Jamet, in. ligne Commissaire des Peres
Recollez de Canada.*